



Teliti semula kenaikan harga bahan binaan akibat COVID-19

Oleh [Zatul Iffah Zolkipli](#) - Januari 25, 2022 @ 5:11pm

MARANG: Kementerian Kerja Raya akan mengemukakan rayuan kepada Kementerian Kewangan untuk melihat kembali senarai barang-barang binaan susulan kenaikan mendadak harga akibat penularan pandemik COVID-19.

Menteri Kanan Kerja Raya, Datuk Seri Fadillah Yusof berkata, langkah itu bagi membantu kontraktor yang sedang melaksanakan projek kerajaan yang terbeban dengan kenaikan mendadak kos berkenaan.

"Selain meminta Kementerian Kewangan melihat kembali senarai barangan itu, kita akan minta lihat semula bagaimana kaedah pengiraan dan jenis projek yang layak mendapat VOP (Syarat Perubahan Harga).

"Buat masa ini, yang layak dapat VOP hanya projek yang berasaskan konvensional tender dan reka bentuk tetapi daripada sebut harga tidak boleh.

"Jadi ini yang kita kena lihat balik dan kita akan bincang kembali dengan Kementerian Kewangan bagaimana kita mahu tangani kenaikan kos yang begitu tinggi supaya ia tidak membebankan kontraktor demi memastikan projek dapat disiapkan untuk kemudahan rakyat," katanya.

Beliau berkata demikian pada Majlis Pecah Tanah Projek Menaik Taraf Jambatan Merentasi Sungai Marang di Laluan FT003 Jalan Kuala Terengganu-Kuantan di sini hari ini.

Majlis pecah tanah dan serahan surat terima projek itu disempurnakan Fadillah bersama Menteri Besar Terengganu, Datuk Seri Dr Ahmad Samsuri Mokhtar.

Fadillah berkata, pihaknya juga akan mengemukakan lanjutan tempoh pelaksanaan VOP yang dilaksanakan dalam kontrak kerja kerajaan.

"Itu yang kita bincangkan. Setakat ini, pelaksanaan VOP adalah sehingga projek siap yang mana ia tertakluk kepada perjanjian tambahan sehingga 30 Jun ini," katanya.

Sementara itu, Fadillah berkata, kementeriannya memperuntukkan hampir RM972 juta untuk projek pembangunan di negeri ini manakala Kementerian Pembangunan Luar Bandar (KPLB) pula memperuntukkan kira-kira RM896 juta.

Katanya, secara keseluruhan, terdapat 19 projek pembangunan yang berada dalam fasa pra-pembinaan dan fasa pembinaan dengan 10 projek di bawah Kementerian Kerja Raya manakala selebihnya di bawah KPLB.